



UNDANG-UNDANG MALAYSIA

CETAKAN SEMULA

Akta 150

AKTA PASPORT 1966

Mengandungi segala pindaan hingga 1 Januari 2006

Teks ini HANYA TERJEMAHAN oleh Jabatan Peguam Negara bagi Passport Act 1966. Melainkan jika dan sehingga ditetapkan sah di bawah subseksyen 7(1) Akta Bahasa Kebangsaan 1963/67 [Akta 32], teks ini bukan perundangan.

DITERBITKAN OLEH
PESURUHJAYA PENYEMAK UNDANG-UNDANG, MALAYSIA
DI BAWAH KUASA AKTA PENYEMAKAN UNDANG-UNDANG 1968
SECARA USAHA SAMA DENGAN
PERCETAKAN NASIONAL MALAYSIA BHD
2006

AKTA PASPORT 1966

| | | |
|------------------------|--------|--|
| Pertama kali diperbuat | | 1966 (Akta No. 21 tahun 1966) |
| Disemak | | 1974 (Akta 150 m.b.p. 1 Oktober 1974) |

CETAKAN SEMULA YANG TERDAHULU

| | | |
|------------------------------------|--------|------|
| <i>Cetakan Semula Yang Pertama</i> | | 1977 |
| <i>Cetakan Semula Yang Kedua</i> | | 2001 |

UNDANG-UNDANG MALAYSIA**Akta 150****AKTA PASPORT 1966**

SUSUNAN SEKSYEN

Seksyen

1. Tajuk ringkas
- 1A. Tafsiran
2. Mengemukakan pasport apabila memasuki atau berlepas dari Malaysia
3. Memasuki atau berlepas dari Semenanjung Malaysia, Sabah atau Sarawak
4. Pengecualian
5. Mengeluarkan orang yang memasuki Malaysia dengan menyalahi undang-undang
6. Perbelanjaan mengeluarkan
7. Pemunya dan ketua vesel bertanggung bagi perbelanjaan
8. Ketua vesel boleh menghalang kemasukan ke dalam Malaysia yang menyalahi undang-undang
9. Beban membuktikan
10. Kuasa untuk menangkap dan menyiasat
- 10A. Kuasa untuk menggeledah dan menyita
- 10B. Penggeledahan dan penyitaan tanpa waran
- 10C. Kuasa untuk menahan dan menggeledah kenderaan
- 10D. Penyitaan barang, dsb.
- 10E. Pelucuthakan barang, dsb. yang disita
- 10F. Tiada kos, ganti rugi, dsb. atas penyitaan
- 10G. Kuasa untuk mendakwa
11. Peraturan-peraturan
12. Kesalahan

Seksyen

- 12A. Kesalahan berhubungan dengan pemerolehan pasport, dsb. bagi orang lain
- 12B. Membuat pasport palsu, dsb.
- 12c. Hadiah
- 12D. Arahan Menteri
- 13. Kecualian

UNDANG-UNDANG MALAYSIA**Akta 150****AKTA PASPORT 1966**

Suatu Akta yang berhubungan dengan pemilikan dan pengemukaan dokumen perjalanan oleh orang yang memasuki atau meninggalkan, atau berjalan di dalam, Malaysia dan bagi memperuntukkan perkara yang berkaitan dengannya.

[1 April 1966, P.U. 133/1966]

Tajuk ringkas

1. (1) Akta ini bolehlah dinamakan Akta Pasport 1966.

(2) *(Ditinggalkan)*.

Tafsiran

1A. (1) Dalam Akta ini, melainkan jika konteksnya menghendaki makna yang lain—

“bukan warganegara” ertinya seseorang selain daripada seorang warganegara;

“kemasukan” dan “masuk” ertinya kemasukan dan masuk melalui darat, laut atau udara;

“ketua” termasuklah juruterbang sesuatu pesawat udara;

“Ketua Pengarah” ertinya Ketua Pengarah Imigresen, Timbalan Ketua Pengarah Imigresen, mana-mana Pengarah Imigresen dan mana-mana Timbalan Pengarah Imigresen yang dilantik di bawah seksyen 3 Akta Imigresen 1959/63 [*Akta 155*];

“Ketua Pengarah Kastam dan Eksais” ertinya Ketua Pengarah Kastam dan Eksais yang dilantik di bawah subseksyen 3(1) Akta Kastam 1967 [*Akta 235*];

“pasport” ertinya sesuatu pasport yang sah yang telah dikeluarkan kepada seseorang oleh atau bagi pihak Kerajaan yang dia merupakan rakyat atau warganegara dan termasuklah apa-apa bentuk dokumen pengenalan yang sah yang dikeluarkan bagi maksud perjalanan oleh mana-mana Kerajaan dan diiktiraf sebagai dokumen perjalanan oleh Kerajaan Malaysia;

“pegawai imigresen” dan “pegawai kanan imigresen” masing-masing mempunyai erti yang diberikan kepadanya dalam Akta Imigresen 1959/63;

“pegawai kastam” dan “pegawai kanan kastam” masing-masing mempunyai erti yang diberikan kepadanya dalam Akta Kastam 1967;

“pegawai polis” dan “pegawai kanan polis” masing-masing erti yang diberikan kepadanya dalam Akta Polis 1967 [Akta 344];

“pemunya” berhubung dengan sesuatu vesel termasuklah seseorang pencarter;

“vesel” termasuklah sesuatu pesawat udara.

Pengemukakan pasport apabila memasuki atau berlepas dari Malaysia

2. (1) Tiap-tiap orang yang memasuki Malaysia dari mana-mana tempat di luar Malaysia hendaklah mengemukakan suatu pasport kepada pegawai imigresen; dan pasport itu hendaklah dalam hal seseorang bukan warganegara, mempunyai suatu visa yang sah bagi Malaysia yang dikeluarkan atas kuasa dan oleh atau bagi pihak Kerajaan Malaysia.

(2) Tiap-tiap orang yang meninggalkan Malaysia untuk pergi ke suatu tempat di luar Malaysia hendaklah mengemukakan suatu pasport kepada pegawai imigresen, jika dikehendaki berbuat demikian oleh pegawai itu.

(3) Seseorang pegawai imigresen boleh, berhubung dengan mana-mana pasport yang dikemukakan di bawah seksyen ini, mengemukakan apa-apa soalan yang difikirkannya perlu kepada mana-mana orang yang mengemukakan pasport itu; dan orang itu hendaklah menjawab soalan itu dengan benar.

(4) Seseorang pegawai imigresen boleh membuat apa-apa pengendorsan yang difikirkannya patut pada mana-mana pasport yang dikemukakan di bawah seksyen ini.

Memasuki atau berlepas dari Semenanjung Malaysia, Sabah atau Sarawak

3. Seksyen 2 hendaklah terpakai bagi seseorang yang memasuki atau meninggalkan *Semenanjung Malaysia, Sabah atau Sarawak dari atau ke mana-mana bahagian Malaysia, sebagaimana ia terpakai bagi seseorang yang memasuki atau meninggalkan Malaysia dari atau ke mana-mana tempat di luar Malaysia, seolah-olah—

- (a) sebutan dalamnya mengenai Malaysia ditafsirkan sebagai sebutan mengenai *Semenanjung Malaysia, Sabah atau Sarawak, mengikut mana-mana yang berkenaan; dan
- (b) sebutan mengenai suatu pasport ditafsirkan sebagai termasuk sesuatu dokumen perjalanan dalam negeri yang dikeluarkan di bawah Akta Imigresen 1959/63.

Pengecualian

4. Menteri boleh melalui perintah mengecualikan mana-mana orang atau golongan orang daripada seksyen 2 atau 3 atau kedua-duanya; dan mana-mana pengecualian sedemikian boleh tertakluk kepada apa-apa syarat yang diarahkan olehnya dan boleh menjadi untuk selama-lamanya atau untuk suatu tempoh yang terhad.

Mengeluarkan orang yang memasuki Malaysia dengan menyalahi undang-undang

5. (1) Tanpa menjejaskan apa-apa penalti yang boleh dikenakan ke atasnya oleh Akta ini, seseorang yang memasuki Malaysia berlawanan dengan Akta ini boleh dikeluarkan dari Malaysia apabila dibuat suatu perintah bagi maksud itu oleh Ketua Pengarah:

Dengan syarat bahawa perintah sedemikian tidak terpakai bagi seseorang warganegara.

*CATATAN—Dalam keseluruhan Akta, sebutan mengenai Semenanjung Malaysia hendaklah ditafsirkan sebagai termasuk sebutan mengenai Wilayah Persekutuan Kuala Lumpur dan Wilayah Persekutuan Labuan—lihat P.U. (A) 159/1984.

(2) Suatu perintah yang dibuat oleh Ketua Pengarah di bawah subseksyen (1) boleh memperuntukkan mengenai penahanan dalam jagaan orang yang baginya perintah itu terpakai, selama apa-apa tempoh yang perlu bagi maksud membuat perkiraan untuk mengeluarkannya; dan orang itu boleh menurut perintah itu ditahan sama ada di dalam penjara atau di mana-mana tempat lain yang ditetapkan oleh Ketua Pengarah bagi maksud itu.

(3) Mana-mana orang yang baginya suatu perintah di bawah subseksyen (1) terpakai boleh dipandu menyeberangi sempadan atau dibawa menaiki sesuatu vesel yang sesuai oleh seseorang pegawai imigresen, pegawai polis atau pegawai kastam, dan boleh ditahan dengan sah di dalam vesel itu selama tempoh vesel itu berada di dalam Malaysia atau di perairan wilayahnya.

Perbelanjaan mengeluarkan

6. (1) Jika suatu perintah yang dibuat di bawah subseksyen 5(1) terpakai bagi seseorang yang telah dibawa ke dalam Malaysia di dalam suatu vesel, ketua vesel itu dan ketua mana-mana vesel lain yang dipunyai oleh pemunya yang sama hendaklah, jika dikehendaki oleh Ketua Pengarah dan tertakluk kepada subseksyen (2), menerima orang itu menaiki veselnya dan memberikan orang itu perjalanan percuma ke pelabuhan atau tempat darinya yang orang itu berlepas, dan penginapan dan saraan yang patut semasa pelayaran itu.

(2) Sesuatu kehendak yang disebut di bawah subseksyen (1) tidak mempunyai kuat kuasa melainkan jika ia dibuat dalam masa dua belas bulan dari tarikh orang yang disebut terdahulu itu memasuki Malaysia.

(3) Ketua sesuatu vesel yang tidak mematuhi subseksyen (1) adalah melakukan suatu kesalahan dan boleh, apabila disabitkan, didenda tidak melebihi lima ribu ringgit atau dipenjarakan selama tempoh tidak melebihi satu tahun atau kedua-duanya.

Pemunya dan ketua vesel bertanggunggan bagi perbelanjaan

7. Ketua dan pemunya dan ejen mana-mana vesel yang dengannya mana-mana orang memasuki Malaysia berlawanan dengan Akta ini bertanggunggan secara bersesama dan berasingan bagi segala perbelanjaan yang dilakukan oleh Kerajaan dalam menahan dan menyara orang itu sementara menanti pengusiran; dan perbelanjaan itu boleh didapatkan sebagai hutang yang kena dibayar kepada Kerajaan oleh ketua, pemunya dan ejen itu.

Ketua vesel boleh menghalang kemasukan ke dalam Malaysia yang menyalahi undang-undang

8. Ketua sesuatu vesel boleh menggunakan segala cara yang munasabah dan wajar (termasuk kekerasan jika perlu) untuk menghalang mana-mana orang daripada memasuki Malaysia berlawanan dengan Akta ini.

Beban membuktikan

9. Jika apa-apa persoalan timbul dalam apa-apa prosiding di bawah Akta ini, atau mengenai apa-apa jua yang dilakukan atau dicadangkan hendak dilakukan di bawah Akta ini, tentang sama ada seseorang—

(a) ialah seorang bukan warganegara atau tidak; atau

(b) tergolong dalam mana-mana golongan tertentu orang yang dikecualikan daripada mana-mana peruntukan Akta ini,

beban membuktikan bahawa orang itu bukan seorang bukan warganegara atau bahawa dia tergolong dalam golongan itu, mengikut mana-mana yang berkenaan, hendaklah terletak atas orang itu.

Kuasa untuk menangkap dan menyiasat

10. (1) Mana-mana pegawai imigresen, pegawai polis atau pegawai kastam boleh menangkap tanpa waran mana-mana orang yang semunasabahnya dipercayai olehnya telah melakukan atau cuba melakukan suatu kesalahan di bawah Akta ini.

(2) Pada menjalankan kuasa menangkapnya di bawah subseksyen (1), seorang pegawai imigresen atau seseorang pegawai kastam terikat untuk mematuhi seksyen 28 Kanun Tatacara Jenayah [Akta 593].

(3) Jika mana-mana orang telah ditangkap di bawah subseksyen (1), dia hendaklah sesudah itu diperlakukan sebagaimana yang diperuntukkan oleh Kanun Tatacara Jenayah.

(4) Seseorang pegawai kanan imigresen, pegawai kanan polis atau pegawai kanan kastam boleh, berhubung dengan apa-apa penyiasatan berkenaan dengan sesuatu kesalahan boleh tangkap yang dilakukan di bawah Akta ini, menjalankan kuasa khas berhubung dengan penyiasatan polis yang diberikan oleh Kanun Tatacara Jenayah.

Kuasa untuk menggeledah dan menyita

10A. (1) Jika ternyata pada Majistret daripada maklumat bertulis yang dibuat atas sumpah dan selepas apa-apa siasatan yang difikirkannya perlu, bahawa terdapat sebab yang munasabah untuk dipercayai bahawa—

- (a) mana-mana premis telah digunakan atau sedang hendak digunakan bagi; atau
- (b) terdapat di dalam mana-mana premis keterangan yang diperlukan bagi membuktikan,

pelakuan suatu kesalahan di bawah Akta ini, Majistret boleh mengeluarkan waran yang memberi kuasa kepada mana-mana pegawai imigresen, pegawai polis atau pegawai kastam yang dinamakan dalamnya untuk, pada bila-bila masa yang munasabah sama ada siang atau malam dan sama ada dengan bantuan atau tanpa bantuan, memasuki premis itu dengan kekerasan jika perlu, dan menggeledah dan menyita, dan mengalihkan dari premis itu, apa-apa barang, peralatan, mesin atau benda lain yang berkenaan dengannya suatu kesalahan telah atau dipercayai telah dilakukan dan apa-apa barang, peralatan, mesin atau benda lain yang semunasabahnya dipercayai dapat dijadikan keterangan tentang pelakuan kesalahan itu.

(2) Seseorang pegawai imigresen, pegawai polis atau pegawai kastam yang bertindak di bawah subseksyen (1) boleh—

- (a) memecah buka mana-mana pintu luar atau pintu dalam premis itu atau mana-mana pagar, kepungan, pintu pagar atau halangan lain ke premis itu supaya dapat masuk ke dalamnya;
- (b) mengalihkan dengan menggunakan kekerasan apa-apa halangan kepada kemasukan, penggeledahan, penyitaan atau pengalihan yang dia mempunyai kuasa di bawah subseksyen (1) untuk melakukan; dan
- (c) menahan tiap-tiap orang yang dijumpai dalam premis itu sehingga premis itu selesai diperiksa.

Pengeledahan dan penyitaan tanpa waran

10B. Jika seseorang pegawai kanan imigresen, seseorang pegawai kanan polis atau seseorang pegawai kanan kastam dalam mana-mana hal keadaan yang disebut dalam seksyen 10A mempunyai sebab yang munasabah untuk dipercayai bahawa oleh sebab kelengahan

mendapatkan waran geledah di bawah seksyen itu maka penyiasatan itu akan terjejas atau barang, peralatan, mesin atau benda lain yang dicari itu mungkin dialihkan atau keterangan yang dicari mungkin diganggu, dia boleh menjalankan di dalam, di atas dan berkenaan dengan premis itu segala kuasa yang disebut dalam seksyen 10A secara yang sepenuhnya dan secukupnya seolah-olah dia telah diberi kuasa berbuat sedemikian melalui waran yang dikeluarkan di bawah seksyen itu.

Kuasa untuk menahan dan menggeledah kenderaan

10c. (1) Walau apa pun apa-apa jua yang terkandung dalam mana-mana undang-undang bertulis lain, jika—

- (a) mana-mana pegawai kanan imigresen, pegawai kanan polis atau pegawai kanan kastam; atau
- (b) mana-mana pegawai imigresen, pegawai polis atau pegawai kastam yang bertindak di bawah arahan seorang pegawai kanan imigresen, pegawai kanan polis atau pegawai kanan kastam, mengikut mana-mana yang berkenaan,

mempunyai syak yang munasabah bahawa mana-mana kenderaan sedang membawa apa-apa barang, peralatan, mesin atau benda lain yang berkenaan dengannya berlaku atau telah berlaku apa-apa pelanggaran Akta ini, dia boleh—

- (aa) menahan dan memeriksa kenderaan itu; dan
- (bb) jika atas pemeriksaan dia mempunyai sebab yang munasabah untuk mempercayai bahawa kenderaan itu sedang atau telah digunakan secara yang berlawanan dengan Akta ini, menyita kenderaan itu dan apa-apa barang, peralatan, mesin atau benda lain yang dijumpai di dalamnya.

(2) Orang yang mengawal atau menjaga kenderaan itu hendaklah, jika dikehendaki berbuat sedemikian oleh pegawai itu—

- (a) memberhentikan kenderaan itu dan membenarkan pegawai itu memeriksanya; dan
- (b) membuka semua bahagian kenderaan itu untuk diperiksa dan mengambil segala langkah yang perlu untuk membolehkan atau memudahkan pemeriksaan itu dijalankan sebagaimana yang difikirkan perlu oleh pegawai itu.

(3) Mana-mana orang yang tidak mematuhi subseksyen (2) adalah melakukan suatu kesalahan dan boleh, apabila disabitkan, didenda tidak melebihi tiga ribu ringgit atau dipenjarakan selama tempoh tidak melebihi dua belas bulan atau kedua-duanya.

Penyitaan barang, dsb.

10D. (1) Apa-apa barang, peralatan, mesin atau benda lain yang semunasabahnya disyaki telah digunakan atau hendak digunakan dalam pelakuan mana-mana kesalahan di bawah Akta ini boleh disita dan ditahan oleh mana-mana pegawai kanan imigresen, pegawai kanan polis atau pegawai kanan kastam.

(2) Jika apa-apa penyitaan dibuat di bawah subseksyen (1), pegawai yang menyita itu hendaklah dengan serta-merta memberikan notis secara bertulis tentang penyitaan itu dan alasannya kepada pemunya barang, peralatan, mesin atau benda lain yang disita sedemikian dengan menyerahkan suatu salinan notis itu kepadanya sendiri atau melalui pos ke tempat perniagaan atau kediamannya:

Dengan syarat bahawa notis tidak dikehendaki diberikan jika penyitaan atau penahanan itu dibuat di hadapan atau dengan pengetahuan pemunya itu.

(3) Bagi maksud seksyen ini, "pemunya" termasuklah seorang ejen atau wakil pemunya itu.

Pelucuthakan barang, dsb. yang disita

10E. (1) Apa-apa barang, peralatan, mesin atau benda lain yang boleh disita atau ditahan di bawah Akta ini boleh dilucuthakkan.

(2) Jika apa-apa barang, peralatan, mesin atau benda lain telah disita di bawah Akta ini, seseorang pegawai kanan imigresen, pegawai kanan polis atau pegawai kanan kastam boleh, mengikut budi bicaranya, melepaskan untuk sementara barang, peralatan, mesin atau benda lain itu kepada pemunya barang, peralatan, mesin atau benda lain itu apabila diberikan jaminan yang memuaskan hatinya bahawa barang, peralatan, mesin atau benda lain itu akan diserahkan kepadanya apabila diminta atau dikemukakan di hadapan mahkamah yang mempunyai bidang kuasa berwibawa apabila diminta.

(3) Suatu perintah bagi melucuthakkan atau bagi melepaskan apa-apa barang, peralatan, mesin atau benda lain yang boleh dilucuthakkan di bawah Akta ini hendaklah dibuat oleh mahkamah yang di hadapannya pendakwaan mengenainya telah diadakan dan suatu perintah bagi melucuthakkan barang, peralatan, mesin atau benda lain itu hendaklah dibuat jika dibuktikan dengan memuaskan hati Mahkamah bahawa suatu kesalahan di bawah Akta ini telah dilakukan dan bahawa barang, peralatan, mesin atau benda lain itu ialah hal perkara atau telah digunakan dalam melakukan kesalahan itu, walaupun tiada seorangpun boleh disabitkan atas kesalahan itu.

(4) Jika tiada pendakwaan mengenai apa-apa barang, peralatan, mesin atau benda lain yang disita di bawah Akta ini, barang, peralatan, mesin atau benda lain itu hendaklah diambil atau disifatkan terlucut hak apabila habis tempoh satu bulan kalendar dari tarikh penyitaan itu melainkan jika sebelum tarikh itu suatu tuntutan dibuat ke atasnya mengikut cara yang berikut:

- (a) mana-mana orang yang mendakwa bahawa dia merupakan pemunya barang, peralatan, mesin atau benda lain itu dan bahawa barang, peralatan, mesin atau benda lain itu tidak patut dilucuthakkan boleh dengan sendiri atau melalui ejennya yang diberi kuasa secara bertulis memberi pegawai kanan imigresen, pegawai kanan polis atau pegawai kanan kastam yang dalam milikannya barang, peralatan, mesin atau benda lain itu berada, notis bertulis menyatakan bahawa dia menuntut barang, peralatan, mesin atau benda lain itu;
- (b) apabila notis itu diterima, pegawai kanan imigresen, pegawai kanan polis atau pegawai kanan kastam, mengikut mana-mana yang berkenaan, hendaklah merujuk tuntutan itu kepada Ketua Pengarah atau Ketua Pengarah Kastam dan Eksais, mengikut kehendak keadaan, yang boleh mengarahkan supaya barang, peralatan, mesin atau benda lain itu dilepaskan atau boleh mengarahkan pegawai itu supaya merujuk perkara itu kepada Majistret atau Hakim Mahkamah Sesyen untuk diputuskan;
- (c) Majistret atau Hakim yang kepadanya perkara itu dirujukkan hendaklah mengeluarkan saman menghendaki orang yang mendakwa bahawa dia yang merupakan pemunya barang, peralatan, mesin atau benda lain itu dan orang yang daripadanya barang, peralatan, mesin atau benda lain itu disita supaya hadir di hadapannya dan atas kehadirannya atau keingkarannya untuk hadir, Majistret atau Hakim

hendaklah meneruskan pemeriksaan perkara itu dan, apabila terbukti bahawa suatu kesalahan di bawah Akta ini telah dilakukan dan bahawa barang, peralatan, mesin atau benda lain itu merupakan hal perkara atau telah digunakan dalam melakukan kesalahan itu, hendaklah memerintahkan supaya barang, peralatan, mesin atau benda lain itu dilucuthakkan dan hendaklah, jika tiada bukti sedemikian, memerintahkan supaya ia dilepaskan.

Tiada kos, ganti rugi, dsb. atas penyitaan

10f. Tiada seorang pun boleh, dalam apa-apa prosiding di hadapan mana-mana mahkamah berkenaan dengan penyitaan apa-apa barang, peralatan, mesin atau benda lain yang disita atau ditahan dalam menjalankan atau berupa menjalankan mana-mana kuasa yang diberikan di bawah Akta ini, berhak mendapat kos prosiding itu atau apa-apa ganti rugi atau relief lain selain suatu perintah bagi pemulangan barang, peralatan, mesin atau benda lain itu atau pembayaran nilainya melainkan jika penyitaan itu dibuat tanpa sebab yang munasabah atau sebab barangkali.

Kuasa untuk mendakwa

10g. (1) Tertakluk kepada subseksyen (2), tiap-tiap pegawai kanan imigresen, pegawai kanan polis atau pegawai kanan kastam hendaklah mempunyai kuasa untuk hadir di dalam mahkamah dan untuk menjalankan apa-apa pendakwaan berkenaan dengan sesuatu kesalahan di bawah Akta ini:

Dengan syarat bahawa dalam hal seseorang pegawai kanan imigresen atau pegawai kanan kastam, pemberikuasaan itu masing-masing tertakluk kepada kelulusan Ketua Pengarah atau Ketua Pengarah Kastam dan Eksais.

(2) Tiada pendakwaan berkenaan dengan apa-apa kesalahan di bawah Akta ini boleh dimulakan tanpa keizinan bertulis Pendakwa Raya.

Peraturan-peraturan

11. Menteri boleh membuat peraturan-peraturan secara am bagi maksud Akta ini.

Kesalahan**12. (1) Mana-mana orang yang—**

- (a) memalsukan, mengubah atau mengusik pasport atau dokumen perjalanan dalam negerinya, atau mana-mana visa atau pengendorsan dalamnya, atau tanpa kuasa yang sah menggunakan atau cuba menggunakan, atau ada dalam milikannya, mana-mana pasport atau dokumen perjalanan dalam negeri yang telah dipalsukan, diubah atau diusik sedemikian;
- (b) menyamar atau secara salah mengemukakan dirinya sebagai atau bukan sebagai seorang yang kepadanya suatu pasport atau dokumen perjalanan dalam negeri telah dikeluarkan dengan sewajarnya;
- (c) dengan niat hendak mendapatkan bagi dirinya suatu pasport, dokumen perjalanan dalam negeri, atau suatu pengendorsan atau visa dalam pasportnya, dengan secara disedarinya membuat apa-apa pernyataan palsu atau mengemukakan apa-apa dokumen yang diketahuinya sebagai palsu tentang apa-apa butir;
- (d) tanpa kuasa yang sah, ada dalam milikannya mana-mana pasport atau dokumen perjalanan dalam negeri yang telah diperoleh hasil pembuatan apa-apa pernyataan material yang palsu atau mengelirukan, atau hasil pengemukaan keterangan palsu;
- (e) membenarkan mana-mana orang memiliki mana-mana pasport atau dokumen perjalanan dalam negeri yang dikeluarkan bagi penggunaannya sahaja, dengan niat atau menyedari bahawa pasport atau dokumen perjalanan dalam negeri itu boleh digunakan oleh mana-mana orang lain;
- (f) tanpa kuasa yang sah, ada dalam milikannya mana-mana pasport atau dokumen perjalanan dalam negeri yang dikeluarkan bagi penggunaan seseorang selain dirinya sendiri;
- (g) dengan sengaja membantu mana-mana orang memasuki Malaysia berlawanan dengan Akta ini;
- (h) dengan sengaja membantu mana-mana orang melanggar Akta ini; atau

- (i) menggalang atau menghalang mana-mana pegawai imigresen, pegawai polis atau pegawai kastam dalam menunaikan kewajipannya di bawah Akta ini,

melakukan suatu kesalahan dan boleh, apabila disabitkan, didenda tidak melebihi sepuluh ribu ringgit atau dipenjarakan selama tempoh tidak melebihi lima tahun atau kedua-duanya.

(2) Mana-mana orang yang melanggar mana-mana peruntukan Akta ini melakukan suatu kesalahan dan boleh, jika tiada penalti lain diperuntukkan oleh Akta ini, didenda tidak melebihi sepuluh ribu ringgit atau dipenjarakan selama tempoh tidak melebihi lima tahun atau kedua-duanya.

Kesalahan yang berhubungan dengan pemerolehan pasport, dsb. bagi orang lain

12A. Mana-mana orang yang dengan niat hendak mendapatkan bagi mana-mana orang lain suatu pasport, dokumen perjalanan dalam negeri, atau suatu pengendorsan atau visa dalam pasport, dengan disedari membuat apa-apa pernyataan palsu atau mengemukakan apa-apa dokumen yang diketahuinya palsu tentang apa-apa butir adalah melakukan suatu kesalahan dan boleh, apabila disabitkan, didenda tidak kurang daripada sepuluh ribu ringgit tetapi tidak melebihi lima puluh ribu ringgit dan dipenjarakan selama tempoh tidak kurang daripada satu tahun tetapi tidak melebihi lima tahun.

Membuat pasport palsu, dsb.

12B. Mana-mana orang yang membuat apa-apa dokumen palsu—

- (a) yang diniatkan untuk digunakan oleh dirinya atau oleh mana-mana orang lain; atau
- (b) yang digunakan oleh dirinya atau oleh mana-mana orang lain,

sebagai suatu pasport bagi maksud Akta ini melakukan suatu kesalahan dan boleh, apabila disabitkan, didenda tidak kurang daripada lima belas ribu ringgit tetapi tidak melebihi seratus ribu ringgit dan dipenjarakan selama tempoh tidak kurang daripada dua tahun tetapi tidak melebihi sepuluh tahun dan disebat tidak melebihi enam sebatan rotan.

Hadiah

12c. Ketua Pengarah boleh mengarahkan supaya apa-apa hadiah sebagaimana yang difikirkannya patut dibayar kepada mana-mana orang bagi apa-apa perkhidmatan yang diberikan berkaitan dengan pengesanan dan pendakwaan sesuatu kesalahan di bawah Akta ini.

Arahan Menteri

12d. Menteri boleh dari semasa ke semasa memberikan Ketua Pengarah arahan yang bersifat umum atau khusus yang konsisten dengan Akta ini tentang penjalanan kuasa dan budi bicara yang diberikan kepada Ketua Pengarah oleh, dan kewajipan yang dikehendaki dilaksanakan oleh Ketua Pengarah di bawah, Akta ini berhubung dengan segala perkara yang didapatinya menyentuh dasar Malaysia, dan Ketua Pengarah hendaklah melaksanakan segala arahan sedemikian.

Kecualian

13. Peruntukan Akta ini adalah tambahan kepada dan tidak mengurangkan peruntukan mana-mana undang-undang yang sedang berkuat kuasa berhubung dengan imigresen.

UNDANG-UNDANG MALAYSIA**Akta 150****AKTA PASPORT 1966****SENARAI PINDAAN**

| Undang-undang yang meminda | Tajuk ringkas | Berkuat kuasa dari |
|-------------------------------|--|-----------------------|
| Akta A69 | Akta Pasport (Pindaan) 1971 | 17-09-1971 |
| Akta 160 | Akta Mata Wang Malaysia (Ringgit) 1975 | 29-08-1975 |
| P.U. (A) 159/1984 | Perintah Wilayah Persekutuan Labuan (Pengubahsuaian Akta Pasport) 1984 | 16-04-1984 |
| Akta A948 | Akta Pasport (Pindaan) 1996 | 01-01-1997 |

UNDANG-UNDANG MALAYSIA**Akta 150****AKTA PASPORT 1966****SENARAI SEKSYEN YANG DIPINDA**

| Seksyen | Kuasa meminda | Berkuat kuasa dari |
|---------|-----------------------|--------------------------|
| 1A | Akta A948 | 01-01-1997 |
| 2 | Akta A948 | 01-01-1997 |
| 6 | Akta A948 | 01-01-1997 |
| 9 | Akta A948 | 01-01-1997 |
| 10 | Akta A948 | 01-01-1997 |
| 10A-10G | Akta A948 | 01-01-1997 |
| 12 | Akta A69 Akta A948 | 17-09-1971 01-01-1997 |
| 12A-12D | Akta A948 | 01-01-1997 |

